



Minggu, 14 April 2024

Ogen : Habakuk 2:18-20



Labo Lit Kegeluhen Bas Gana-gana



Sekalok anak perana lawes ku rumah pendeta ras temanna. I bas rumah e iturikenna ukurna segelah ertoto ras pendeta segelah seh sura-surana. Nina i bas ukurna adi enggo kari ertoto, salang sai janah seh me sura-sura. Sedekah enda igejapkenna maka i je atena tutus nandangi sekalok singuda-nguda i je ka me singuda-nguda ndai nadingken ia. Si enda terjadi rulih-ulih i bas geluhna. Tupung ertoto ras pendeta tersungkun me pendeta kerna si pernah ipakena guna banci nehi sura-surana ndube. Ngaku me ia maka pernah ipindona petetap ukur si itama i bas cincin. Cincin e ipakena dengen tek ia cincin e erkuasa. Megi kesaksin enda ibabai me ia guna ngasup ngejapken Kuasa Dibata adi nggit dengen ersuruh ukurna guna ngelepaskan cincin e. Ilepaskan me cincin e, itutung janah ngaku salah anak perana enda arah pertotonna man Tuhan sabap sedekah enda teken ia man cincin e asangkan Kuasa Dibata. Piga-piga bulan kenca si e iberitakenna man pandita enggo tudu arih ras atena keleng janah ipasu-pasu me ia.

“Kai kin gana-gana?” Nina Habakuk. Bas ogenta ipetangkas kerna gana-gana e manusia erbahanca, ngajarken guak. Kalak si ernalem man bana cilaka me. Aminna ilapisi alu pirak entah emas labo lit kegeluhen i je. Labo banci iberekenna ketangkasen. Keriahenna terjeng nebu-nebu kap ngenca.

Gana-gana e bali ras cincin si lit bas kesaksin sekalok anak perna ndai. Kalak si ernalem man gana-gana enggo nundalken perintah Dibata kap. Nina “ola ibahandu gana-gana entah gambar-gambaren kerna kai pe si lit i datas langit, i doni ntah pe si ibas lau i teruh doni. Ola kam erjimpuh man gana-gana entah ersembah ku je, sabap Aku kap Tuhan Dibatandu si percemburu. Asa kai kalak si ernembah ate man bangku ku ukum ia ras anak-anakna seh kukesusuren si petelukan ras si peempatkan” (Kel. 20:4-5).

 *“lalit ertina ernalem man gana-gana”*

